

Ба Эрса Мэсих сынёнхали

1 Нэжитян, Римди хуоншон Август гиди фынфу, жё тьянщяди жынму ду ба тамуди фур суанчулэни, йинви жыгэ таму ё до зыжиди чынпуни чи, ба тамуди щинмин щелини. 2 Квириний жыжон Сирияди сыхур, жысы жынму туйибян чи щели зыжиди щинминли. 3 Йиче жынму ду до зыжиди чынпуни ще щинмин чили. 4 Юсуф е да Галилея дифоншонди Назарет чынпуни чўлэ, доли Иудея дифоншонди Давуди чынпуни (жыгэ чынпуди минзы жёди Вифлеем), йинцысы Юсуф зусы Даву йизў-йижяди жын. 5 Юсуф лян Мария лёнгэр е ще щинмин чили. Нэгэ сыхур таму лёр хан мё чынфон пыйдуйни, кэсы Мария дўли хуэйди вава. 6 Таму до нэтар Мария куэ ё зуэйүэни. 7 Та ба туйигэ Эрзы сынёнхали; ба йүэвазы лян бу гуэчу чедо мацонили, йинцысы кифонзыни мёю вифынлэ. 8 Зэ нэгэ дифоншон ю фон-ёнди жынни, таму йиванщи хуанбанзыди кан ёндини. 9 Анла дафа чиди тьянщян зандо таму мянчянди сыхур, Анла щянчўди гуонлён сымян-баха ба фон-ёнди жынму жолёнли, ба таму хазали. 10-11 Нэгэ тьянщян дуйчў таму фэсы: «Ниму бэ хэпали! Вэ ги ниму фэ до дуйчў йиче жынмушон ю хын гощинди сычин: жиргэ зэ Давуди чынпуни ба дажю нимуди Эрса Мэсих сынёнхали. 12 Ниму зэ нэтар нын кандо йигэ йүэвазы физэ мацони лян бу гуэдини; жы зусы ги нимуди жихо». 13-14 Мынмын тьяншовди да жүндуй лян нэгэ тьянщян йидарни куажён Анла фэли: «Жыган тьяншонди Хўда! Ги Та щинэди дижешонди жынму панвон пиннан!» 15 Тьянщянму ба фон-ёнди жынму лёха, йиху шонли тьяли. Фон-ёнди жынму йигэ ги йигэ фэди: «Заму зудо Вифлеем чынпуни чи кан Анла ги заму фэхади сычин зу». 16 Таму хуонхуон-монмонди чили шынли, доли нэгэ дифон, зу ба Мария лян Юсуф зожуэли, жар фон-ёнди жынму зу ба мацони фиди Эрвазы канжянли. 17 Йиху таму зу ба тьянщян фэхади нэгэ Эрвазы либянди хуа ги дажя ду фэли. 18 Дажя ба фон-ёнди жынму фэхади хуа тинли йиху, ду чёчихали. 19 Мария ба жыщезы сычин жидо зыжиди шиннили. 20 Фон-ёнди жынму хуэйлэ зу куажён Анлади, йинцысы таму тинхади

дэ жянхади йиче сычин жынсы лян нэгэ тянщян ги таму фэхади
йиён.